



REPUBLIKA E SHQIPËRISË
PROKURORIA E PËRGJITHSHME
PROKURORI I PËRGJITHSHËM

Nr. 571/11 Prot.

Tiranë, më 28. 04. 2021

LËN DA: Për intensifikimin e masave administrative dhe procedurale për hetimin dhe ndjekjen penale të veprave penale në fushën e zgjedhjeve.

PROKURORIVE TË RRETHIT GJYQËSOR

PROKURORIVE TË APELEVE

DREJTORIVE DHE SEKTORËVE

K Ë T U

Në kuadrin e mbikëqyrjes¹ të zbatimit të masave administrative dhe procedurale të normuara në udhëzimin e përgjithshëm nr.3/2019² i ndryshuar, dhe kujdesit për ushtrimin e kompetencave kushtetuese dhe ligjore në prokurori³, ju risjell në vëmendje, drejtuesve të prokurorive dhe prokurorëve në prokuroritë me juridiksion të përgjithshëm, të vlerësojnë në dinamikë gjendjen, ecurinë e hetimeve, dhe nevojat e marrjes së masave procedurale, për rritjen e intensitetit të hetimeve dhe ushtrimit të ndjekjes penale në njësitë administrative që mbulon rrethi gjyqësor i asaj prokurorie, forcimin e bashkëpunimit me Komisionin Qendror të Zgjedhjeve, si dhe zbatimin nga drejtuesit të kompetencave të parashikuara në ligj⁴, sipas fazave të procedimit penal, me synim rritjen e efektivitetit të hetimeve dhe ushtrimit të ndjekjes penale ndaj autorëve të veprave penale që prekin zgjedhjet e lira dhe sistemin demokratik të zgjedhjeve ose të veprave penale të tjera që dëmtojnë procesin zgjedhor, në periudhën para dhe pas zgjedhore, veçanërisht:

¹ Shih, nenin 38 pika 2 shkronja "b" e ligjit nr.97/2016 "Për organizimin dhe funksionimin e prokurorisë në Republikën e Shqipërisë";

² Shih, udhëzimin e përgjithshëm nr.3, datë 21.06.2019 "Mbi masat administrative dhe procedurale në prokuroritë me juridiksion të përgjithshëm në periudhën para dhe pas zgjedhore" i ndryshuar/plotësuar me udhëzimin e përgjithshëm i PP nr.2/2021, datë 31.03.2021.

³ Shih, nenin 38 pika 2 shkronja "f" e vijues të ligjit nr.97/2016 "Për organizimin dhe funksionimin e prokurorisë në Republikën e Shqipërisë"

⁴ Shih, nenin 42, 43, 45, 46, 48 e vijues të ligjit nr.97/2016 .

1. Në fazën e hetimeve paraprake, vlerësimi dhe trajtimi me prioritet dhe në afate optimale, i çdo referimi apo kallëzimi për veprat penale që prekin zgjedhjet e lira dhe sistemin demokratik të zgjedhjeve, ose të çdo vepre tjetër penale që dëmton procesin zgjedhor, i ekzistencës së kushteve/kritereve ligjorë për regjistrimin e procedimit penal, i bashkërendit me KQZ për kallëzimet e paraqitura prej tij, dhe/ose me agjencitë ligjzbatuese të specializuara, për kryerjen e hetimeve proaktive, duke përdorur mjetet e posaçme të hetimit, dhe rritjen e intensitetit të hetimeve për këto vepra penale.

1.1 Prokurorët i delegojnë veprimet hetimore oficerëve të policisë gjyqësore të seksionit dhe/ose të shërbimeve policore në strukturat hetimore përkatëse, duke urdhëruar, si kryerjen e veprimeve intensive hetimore të nevojshme, ashtu dhe përcaktojnë afate kohore të përshpejtuara për kryerjen e tyre dhe të mbikëqyrin periodikisht zbatimin e urdhërimeve të tyre, deri në përfundim të hetimeve paraprake për secilin procedim për këto vepra penale.

2. Prokurorët të rrisin prioritetin dhe intensitetin e veprimet procedurale, për të siguruar: -hetime të plota, gjithëpërfshirësë dhe në afate sa më të shkurtra të çështjeve; - ngritjen e akuzës në gjykatë bazuar në rrethanat e faktit të provuara dhe në ligjin material penal e procedural penal të zbatueshëm; -përfaqësimin e akuzës/çështjes në gjykatë me pavarësi, profesionalizëm dhe integritet, duke garantuar mbrojtjen e zgjedhjeve të lira dhe sistemin demokratik të zgjedhjeve, ashtu dhe liritë personale dhe interesat e ligjshme të shtetasve.

3. Prokurorët në kërkesat për caktimin e masave të sigurimit personal dhe për caktimin e masave të dënimit për këto grupvepra penale, të ashpërsojnë kërkimet, si për llojin e masave të sigurimit personal, ashtu dhe për llojin dhe masat e dënimit për veprat penale në fushën e zgjedhjeve më të përhapura dhe me tendencë në rritje në shkallë vendi, apo në njësitë administrative në kompetencë tokësore të gjykatës pranë të cilës ushtron funksionet prokuroria.

4. Drejtuesi i prokurorisë⁵, i cili përgjigjet⁶ për mbarëvajtjen e hetimeve të këtyre veprave penale, kur e vlerëson të nevojshme për mbarëvajtjen e ecurisë së procedimit/çështjes, nxjerr udhëzim jo të detyrueshëm me shkrim⁷ për prokurorin përkatës, për kryerjen e detyrave specifike për të garantuar një hetim të plotë e të gjithanshëm dhe në afate të përshpejtuara, në kuadrin e një procedimi të drejtë dhe të rregullt ligjor, si dhe ndjek në dinamikë veprimtarinë e procedimeve, duke kërkuar informacion nga prokurorët për ecurinë e procedimeve dhe verifikuar përfundimin e secilës çështje, dhe/ose duke nxjerrë udhëzime me shkrim sipas ligjit në rastet kur vlerësohet e nevojshme kryerja e veprimeve të mëtejshme procedurale, përpara se të merret vendimi mbi mënyrën e përfundimit të hetimeve paraprake nga prokurori⁸.

⁵ Shih, shkronja "c", pika 1 e nenin 48 "Udhëzimet jo të detyrueshme për çështje konkrete" të ligjit nr.97/2016.

⁶ Shih, nenin 43 të ligjit nr.97/2016, i ndryshuar me nenin 1 të ligjit nr.148/2020, hyrë në fuqi me date 28.01.2021 (FZ-Nr.5/2020), i cili ka shtuar shkronjën "e" me këtë përmbajtje: "e) përgjigjet për hetimin e veprave penale që prekin zgjedhjet e lira dhe sistemin demokratik të zgjedhjeve, të cilat janë kompetencë e prokurorisë që drejton"

⁷ Shih, shkronjat "b", "c", "ç" e vijues nenin 43 në lidhje me nenin 48 të ligjit nr.97/2016.

⁸ Shih, pikat 3, 4 e vijues të nenin 48 të ligjit nr.97/2016.

5. Struktura përkatëse në Prokurorinë e Përgjithshme, drejtuesit e prokurorive dhe prokurori për marrëdhëniet me publikun, marrin të gjitha masat administrative të nevojshme për bashkërendimin dhe koordinimin institucional, për të siguruar dhe shkëmbyer informacionet dhe dërgimin Komisionit Qendror të Zgjedhjeve, sipas ligjit dhe udhëzimit të përgjithshëm nr.3/2019 i ndryshuar.

Me këtë qarkore të njihen gjithë prokurorët, drejtuesit e prokurorive me juridiksion të përgjithshëm dhe oficerët e policisë gjyqësore të seksioneve e të shërbimeve që ushtrojnë funksionet pranë strukturave hetimore përkatëse. Drejtuesit e prokurorive me juridiksion të përgjithshëm dhe struktura përkatëse në Prokurorinë e Përgjithshme të marrin masat e duhura organizative dhe ligjore, për zbatimin, mbikëqyrjen dhe informimin për zbatimin e kësaj qarkore e lidhur me udhëzimin e përgjithshëm nr.3/2019 i ndryshuar.

PROKURORI PËRGJITHSHËM

OLSIAN ÇELA

